

摘藻堂四庫全書薈要

集部

欽定四庫全書薈要卷一萬六千二百五十六

集部

秋澗集卷一百

元 王惲 撰

玉堂嘉話卷八

甲午九月望日東原五六友人會于孫侯小軒話及前朝得失之漸座客問云金有中原百有餘年將來國史何如爾或曰自唐以降五代相承宋受周禪雖靖康間二帝蒙塵緣江湖以南趙氏不絕金於宋史中亦猶劉石符姚一載記爾衆頗惑焉僕曰正閏之論愚雖不敏

試以本末言之夫耶律氏自唐以來世為名族延及唐

末朱溫篡唐四方幅裂遼太祖阿保機乘時而起服高

麗諸國并燕雲以北數千里改元神冊與朱梁同年即

位元年丁卯在位十九年遼太宗嗣位諱德光太祖第三子改元天顯

元年丙戌與唐明宗同年即位十一年河東節度使石敬瑭為清泰來

伐遣使求救于遼奉表稱臣仍以父禮事之遼太宗赴

援以滅後唐石氏號晉晉以燕雲十六州獻於遼太宗

歲貢帛三十萬疋天福七年晉高祖殂出帝嗣位大臣

議奉表稱臣告哀于遼景延廣請致書稱孫而不稱臣
與遼抗衡太宗舉兵南下會同九年入汴以出帝為負
義侯置于黃龍府石晉遂滅大同元年太宗北還仍以
蕭翰留守河南劉知遠在河東乘間而發由太原入汴
自尊為帝及乎宋受周禪有中原一百六十餘年遼為
北朝世數如之雖遼之封域褊于宋校其兵力而澶淵
之戰宋幾不守因而割地連和歲貢銀絹二十萬兩足
約為兄弟仍以世序昭穆降及晚年遼為翁宋為孫至

天祚金朝太祖舉兵西來平遼克宋奄有中原三分之
二子孫帝王坐受四方朝貢百有餘年今以劉石等比
之予故不可不辨夫劉淵石勒皆晉之臣庶叛亂國家
以臣伐君縱能盜據一隅僭立姚泓終為晉將劉裕所
擄斬于建康市返本還原茲作載記理當然也夫完顏
氏世為君長保有肅慎至武元時而天下南北敵國素
非君臣若依席上所言金為載記未審遼史復如何况
方遼太祖神冊之際宋太祖未生遼祖比宋前期五十

餘年已即帝位固難降就五十年之後包於宋史為載
記其世數相懸名分顛倒斷無此法既遼之世紀宋不
可無其金有中原更難別議以公論處之據五代相因
除莊宗入汴復讎伐罪理勢可觀朱梁篡逆甚於窮新
石晉因遼有國終為遼所虜劉漢自立父子四年郭周
廢湘陰公而立以五代之君通作南史內朱梁名分猶
恐未應遼自唐末保有北方又非篡奪復承晉統加之
世數名位遠兼五季與前宋相次而終為北史宋太祖

受周禪平江南收西川白溝迤南悉臣大宋傳至靖康
當為宋史金太祖破遼克宋帝有中原百有餘年當為
北史自建炎之後中國非宋所有宜為南宋史或曰歐
陽宋之名臣也定立五代不云南史當時想曾熟議如
何今日復有此論僕曰歐陽公作史之時遼方全盛豈
不知梁晉漢周授受之由故列五代者欲膺周禪以尊
本朝勢使而然至於作十國世家獨稱周漢之事可謂
難矣請事斯語厥有旨哉愚讀李屏山詠史詩詠五代

郭周云不負先君持節死舉朝唯有一韓通愚嘗驚嘆
此詩命意宋自建隆以來名臣士大夫論議篇章不為
不多未嘗有此語非不能道也蓋禘之說也故列五代
者良可知隋季文中子作元經至晉宋以後正統在中
原而後大唐南北一統復至五代天下擾擾無由再議
降及今日時移事改商確前人隱約之迹當從公論議
者又曰金有中原雖百餘年宋自建隆于今幾三百年
況乎今年春正月攻陷蔡城宋有復讐之迹固可兼金

愚曰元魏齊梁世數已遠恐諸公不以為然請以五代

周漢之事方之漢隱帝乾祐三年遇弒太后詔立帝弟

武寧軍節度使嗣位

名贊河東節度使劉旻之子

後雖廢為湘陰公

旻尋亦即皇帝位於晉陽終旻之世猶稱乾祐四帝二

十九年至宋太祖興國四年歸宋依今日所論旻係劉

高祖母弟在位四年其子承鈞嗣位改元天會五年郭

周已絕

郭周三主九年東漢四主二十九年

東漢四主遠無郭周郭亦不

當稱周固當為閏宋太祖不曰受周禪傳至太宗方承

東漢之後歐陽不合作五代史合作四代史司馬光通鑑當列東漢為世紀歐陽不宜作十國世家嗚呼國家正閏固有定體不圖今日輕易褒貶在周則為正在金則為閏天下公論果如是乎況蔡城一事蓋天朝征伐之功是時宋之邊將專權率意自撤藩籬快斯須之忿昧唇齒之理自謂愛已而惡佗延引強兵深入遵行覆轍

徽宗跨海助金破遼之事

媒孽後禍取笑萬世何復讐之有也宋

自靖康以來稱臣姪走玉帛歲時朝貢幾於百年豈期

今日私論遽稱尊大果使宋廟有靈必可其議也泰和
間南宋寒盟起無名之師侵漢唐鄧宿泗章宗分遣應
兵其淮漢川蜀之間大為所破宋遣臣方信孺等卑辭
告和請叔為伯進增歲幣獻權臣之首

韓侂冑侯師且
也繪其容漆其

首函送
幽都

至于闕下信孺

闕

有古調一篇猶能草畧記之

大朝君相仁且慈小麥未熟休王師姦臣豈足贖民命
既往不咎來可追此詩書於上源驛壁間館伴使入朝
題奏上頗哀憐是時中原連年蝗旱五穀不登山東尤

甚章廟自責之心深重形於歌詠者頗多每以偃兵為
念故詔百官議曰朕聞海陵有言我國家雖受四方朝
貢宋猶假息江左亦天下兩家邪故有親征之行去歲
宋人兵起無名搖蕩我邊鄙今已敗衄哀懇告和朕思
海陵之言宜如何爾時臣下本希上意故進言曰先于
靖康間宋祚已衰其游魂餘魄今雖據江左正猶昭烈
之在蜀不能紹漢之遺統大可見也和議乃定今日校
之此語乃當時繼好息民之大畧非後世正閏之定論

或曰何以知之曰夫昭烈之于漢雖云中山靖王之後其族屬疏遠不能記錄世數名位南宋高宗乃徽宗之子欽宗之弟歲月不易以即位奄有江南似與昭烈頗異若以金史專依泰和朝議特承宋統或從今日所論包為載紀二論俱非至公座客又云遼之有國僻居燕雲法度不一似難以元魏北齊為比僕再拜而言曰以此責之膚淺尤甚若以居中土者為正則劉石慕容苻姚赫連所得之土皆五帝三王之舊者也若以有道者

為正符秦之量雄材英畧信任不疑朱梁行事篡奪內
亂不得其死二者方之統孰得焉夫授受相承之理難
以此責況乎泰和初朝廷先有此論故選官置院創修
遼史闕期榜狀元張櫟預焉後因南宋獻馘告和臣下
奏言靖康間宋祚已絕當承宋統上乃罷修遼史緣此
中州士大夫間不知遼金之興本末各異者向使泰和
間若遼史早得修成天下自有定論何待余言座客愕
然曰數百年隱顯之由何其悉也問一得三實出望外

幸謂言之僕因就毫楮錄狂斐以俟烹事者刪之庶備他日史官之採摭云爾燕山修端謹記

鹿菴云古詩句多平字不能得健如杜詩古調一句七字有至六字無平者律則當如樂律和應否則不成音矣

紀行

張參議耀卿

歲丁未夏六月初吉赴召北上發自鎮陽信宿過中山時積陰不雨有頃開霽西望恒山之絕頂

所謂神
峯者聳拔

若青蓋然自餘諸峯歷歷可數因顧謂同侶曰吾輩此行其速返乎此退之衡山之祥也翌日出保塞過徐河橋西望琅山森若劒戟而葱翠可挹已而由良門定興抵涿郡東望樓桑蜀先主廟經良鄉渡蘆溝橋以達於燕居旬日而行北過雙塔堡新店驛入南口度居庸關出關之北口則西行經榆林驛雷家店及于懷來縣縣之東有橋中橫木而上下皆石橋之西有居人聚落而縣郭蕪沒西過鷄鳴山之陽有邸店曰平輿其巔建僧

舍馬循山之西而北沿桑乾河以上河有石橋由橋而西乃德興府道也北過一邸曰定防水經石梯子至宣德州復西北行過沙嶺子口及宣平縣驛出得勝口抵梔胡嶺下有驛曰博囉自是以北諸驛皆蒙古部族所分主也每驛各以主者之名名之由嶺而上則東北行始見毳幕羶車逐水草畜牧而已非復中原之風土也尋過撫州惟荒城在焉北入昌州居民僅百家中有一廨舍乃國王所建也亦有倉廩隸州之鹽司州之東有鹽

池周廣可百里土人謂之狗泊以其形似故也州之北
行百餘里有故壘隱然連亘山谷壘南有小廢城問之
居者云此前朝所築堡障也城有成者之所居自堡障
行四驛始入沙陀際陀所及無塊石寸壤遠而望之若
岡陵丘阜然既至則皆積沙也所宜之木榆柳而已又
皆樗散而叢生其水盡鹹鹵也凡經六驛而出陀復西
北行一驛過魚兒泊泊有二焉周廣百餘里中有陸道
達于南北泊之東涯有公主離宮其外垣高丈餘方廣

一里許中建寢殿夾以二室背以龜軒旁列兩廡前峙
眺樓登之頗快目力宮之東有民匠雜居稍成聚落中
有一樓榜曰迎暉自泊之西北行四驛有長城顏址望之
綿延不盡亦前朝所築之外堡也自外堡行一十五驛
抵一河深廣約什濤沱之三北語云實里蘭漢言驢駒
河也夾岸多叢柳其水東注甚湍猛居人云中有魚長
可三四尺春夏及秋捕之皆不能得至冬可鑿冰而捕
也瀕河之民雜以番漢稍有屋室皆以土冒之亦頗有

種藝麻麥而已河之北有大山曰庫克烏呼漢言黑山也
自一舍外望之黯然而有茂林者迫而視之皆蒼石也
蓋常有陰靄之氣覆其上焉自黑山之陽西南行九驛
復臨一河深廣加實里蘭三之一魚之大若闕捕法

亦如之其水始西流深急不可涉北語云鴻托懶漢言
兔兒也遵河而西行一驛有契丹所築故城可方三里
背山面水自是水北流矣由故城西北行三驛過博勒
格圖乃弓匠積養之地又經一驛過大澤泊周廣約六

七十里水極澄澈北語謂鄂濟木諾爾自泊之南而西分道入和林城相去約百餘里泊之正西有小故城亦契丹所築也由城四望地甚平曠可百里外皆有山山之陰多松林瀕水則青楊叢柳而已中即和林川也居人多事耕稼悉引水灌之間亦有蔬圃時孟秋下旬麻麥皆槁問之田者云已三霜矣由川之西北行一驛過馬頭山居者云上有大馬首故名之自馬頭山之陰轉而復西南行過呼蘭齊勒乃奉部曲民匠種藝之所有

水曰塔密爾河注之東北又經一驛過石堠石堠在驛道旁高五尺許下周四十餘步正方而隅巍然特立于平地地形甚奇峻遙望之若大堠然由是名焉自堠之西南行三驛過一河曰唐古以其源出於西夏故也其水亦東北流水之西有峻嶺嶺之石皆鐵如也嶺陰多松林其陽帳殿在焉乃避暑之所也迨中秋後始啓行東由驛道過石堠子至呼蘭齊勒

山名以其形似紅耳也

東北迤邐入

陀山自是且行且止行不過一舍止不過信宿所過無

名山大川不可殫記至重九日王師麾下會于大牙帳
灑白馬潼修時祀也其什器皆用木樺不以金銀為飾
尚質也十月中旬方至一山崦間避冬林木甚盛水皆
堅凝人競積薪儲水以為禦寒之具其服非毳革則不
可食則以羶肉為常粒米為珍比歲除夕輒遷帳易地
以為賀正之所日大宴所部於帳前自王以下皆衣純
白裘三日後方詣大牙帳致賀禮也正月晦復西南行
二月中旬至呼蘭齊勒東行及馬頭山而止趣春水飛

放故也四月九日率麾下復會於大牙帳灑白馬漣什
器亦如之每歲惟重九四月九凡致祭者再其餘節則
否自是日始回復由驛道西南往避暑所也大率遇夏
則就高寒之地至冬則趨陽暖薪水易得之處以避之
過以往則今日行而明日留逐水草便畜牧而已此風
土之所宜習俗之大畧也僕自始至迨歸遊於王庭者
凡十閱月每遇燕見必以禮接之至於供帳衾褥衣服
飲食藥餌無一不致其曲則眷顧之誠可知矣自度衰

朽不才其何以得此哉原王之意出於好善忘勢為吾
夫子之道衰而設抑欲以致天下之賢士也德輝何足
以當之後必有賢於隗者至焉因紀行李之本末故備
誌之戊申夏六月望日太原張德輝謹誌

商司業錄到太常諸雜儀禮

文德殿宿齋儀注差官等

景靈宮行禮儀注差官等

太廟行禮儀注差官等

明堂大禮陞降玉輅儀注

明堂殿行禮儀注

明堂殿星圖

明堂大禮畢紫宸殿稱儀注

明堂大禮畢登門肆赦儀注

明堂升陪事并禮饌差官等

明堂降御劄鑠院并奏告事

明堂大禮修築路道圖

明堂大禮笏記

明堂大禮排日祭祀

明堂降御劄修路教車按輅等年代月日

明堂大禮逐次趨那更點

明堂大禮差五使等官年代例

明堂大禮總差官

頭冠法服樣

玉輅圖

玉輅件段尺寸

及太平車
尺寸等

逍遙平輦圖

并尺寸等

大常樂圖

祭器圖

黃麾大仗圖

明堂大禮文武官合着服色等

御龍直執從物圖

明堂大禮鼓吹鷄唱警場圖

明堂大禮樂章樂曲

明堂大禮合降指揮等

明堂大禮為值雨降過生創指揮例

明堂大禮諸雜事例等

明堂大禮祇應并鋪分人數等

熙朝盛典詩

大安輦件段

明堂大禮教象申請事節

計三十七冊曰明堂大禮

景定四年藍大正記

至元三十年三月二十九日商琥錄

宣和鹵簿圖

祀圜丘圖

東封泰山圖

監修國史例

忠齋劉承旨說宋朝監修國史宰相初任者謂之開局
一月一至院謂之過局至元三十一年甲午七月初四
日右丞相完澤受開府儀同三司監修國史右丞相如
故

竇儼水論

周世宗南伐駐蹕臨淮因覽唐貞元中泗州大水記詔
竇儼論其事儼獻文其畧曰夫水沴所具厥有二理一
曰數二曰政天地有五德一曰潤二曰暎三曰生四曰
成五曰動五德者陰陽之使也陰陽者水火之本也陰
陽有常德故水火有常分奇耦收半盈虛有準謂之通
正羨倍過亢極無不至謂之咎徵二者大期率有常數
除之主始於淵獻水之行紀于九六凡千有七百二十
有八歲為浩浩之會當是時也陰布固陽澍雨天下百

水臙注漲其通川岸不受餘則旁吞原隰科坎平槩則
漂墊方割雖堯舜在上臯夔佐政亦不能弭其沴也過
此以還則係於時政如其后辟狂妄以自率權臣昧冒
以下專政不明賢不立則苦雨數至潦水積厚此陰陽
之數也貞元壬申之水匪數之期乃政之感也德宗之
在位也啓導邪政狎暱小人裴延齡專利為心陰潛引
納陸贄有其位棄其言由是明明上帝不駿其德乃降
常雨害於梁盛百川沸騰壞民廬舍固其宜也王者苟

能修五政崇五禮禮不瀆政不紊則五日一霏微十日一霖霖十五日一滂沱謂之時雨所以正五運之制節占象畧刻無有差爽則神農之世其驗歟世宗嘉之國初遷禮部侍郎依前學士判太常如故是時祠祝樂章宗廟謚號皆儼所定撰人服其該博儼冲澹寬簡好賢樂善平居怡怡如也未嘗失色於僮僕優游文翰凡十數年著大周正樂三十卷詔藏於史閣其大周通禮未及編纂會儼卒議者惜之

至元貞元年歲六月十三日宋太祖實錄抄并校勘無
差時開真定野河事甚不便

金史

王文康公定奪

此王狀元先生
時為承旨學士

帝紀九

太祖

太宗

熙宗

海陵庶人

世宗

章宗

衛紹王 實錄闕

宣宗

金史卷一百一
表一百
哀宗 實錄關

志書七

天文 五行附

地理 邊境附

禮樂 郊祀附

刑法

食貨 交鈔附

百官 選舉附

兵衛 世襲附

列傳 舊實錄三品以上入傳今擬人物英偉及勲業可稱不限品從

忠義

隱逸 高士附

儒行

文藝

列女

方技

逆臣呼沙呼

諸王后妃開國功臣在先

書示仲謀王相修史事宜急不宜緩多年採訪竊恐老人漸無費用不可惜當置厯令一人專掌以後元裕之蕭公弼奏用銀二千錠今即編修書寫請俸飯食紙劄費用作若干定撰三五百定都了又命採訪文字令言者旌賞隱者有罰仲謀所宜着心編修且要二員直須

選擇如魏太初及周幹臣云云本把合用儒人兼管不宜用他色目如他日同修編修人來房屋缺少目今便合商議起蓋蓋下房屋都在文廟以後也得用謂如仲謀兼編修徒單雲甫受直學士兼同修李仁卿學士兼同修胡紹開年小也宜喚去比至定俸且與批支若家小來更好都交文廟裏住史事早成其他不預史事者在於文廟自當退去此明年話也仲謀宜知之書寫典史雜使以後必須用謂文字未集且定編修二人若路

逐書寫二名更佳雜使亦不可闕將來院官不要人使

喚

闕

中統一年示

秋澗集卷一百

秋澗集附錄

制辭

授翰林修撰

王惲行已無忝博學能文顧超絕之逸才足鋪張於偉績且司綸命以贊皇猷可特授翰林修撰同知制誥兼國史院編修官當振斯文以宣朕命

封謚

制曰文章與時高下陋乎宋而迨乎唐人材隨世污隆

尊其官而美其謚僉謂賁賤之信度大茲渙號以揚庭
故翰林學士中奉大夫知制誥同修國史王惲博學修
能雄文逸氣五持憲節誅錐吏弊而翼植民彝三入詞
林敷潤皇猷而表章帝典進承華之昭鑑恢儲聖之良
規觀其遺書蓋抱經綸之志詢夫成績豈徒黼黻之才
惟治朝著蔡之是稽繫後生斗山之所仰式遄歸而請
老遽興歎於云亡睠彼壽耆議斯節惠於戲有斐君子
何盛德之可忘無競維人尚裕昆之克紹肝膾已朕魂

魄猶強可贈翰林學士承旨資善大夫追封太原郡謚
文定主者

闕

皇帝聖旨裏中書省御史臺呈據監察御史呈竊見故
翰林學士秋澗王文定公文才博雅識見老成乃中州
之名士也頃在翰林暨居臺寮觀其因事匡時立言傳

世未嘗不以致君澤民為心端本澄源是務進呈承華
事畧蒙裕宗皇帝嘉納俾諸皇孫傳觀弘益良多近日
又蒙聖上特命張司農等再行繪寫以賜東宮若非深
有可取豈能如是哉即係兩朝御覽珍重文集又有元
貞守成事鑑中堂事記烏臺筆補玉堂嘉話并其餘雜
著光明正大骨健雄深皆出於仁義道德之興裨益政
務有關風教足為一代之偉觀故追贈其制詞有云觀
其遺書蓋抱經綸之志詢夫成績豈徒黼黻之才惟先

朝著蔡之是稽繫後生斗山之所仰其子太常禮儀院
司直公孺編類成書計一百卷字幾百萬家貧不能播
刊無以副中外願見之心翰林國史院已嘗為言未蒙
定奪若依祕書少監楊桓六書統郝奉使文集例具呈
都省移咨江浙或江西行省於學田子粒錢內刊行昭
布諸路學校以示後進非惟儒風有所激勵實彰聖朝
崇儒之盛事也具呈照詳得此送據禮部呈照到郝文
忠公例著述陵川文集一十八冊三國志三十冊已經

具呈都省於江南行省所轄儒學錢糧多處就便刊行
去訖本部議得翰林學士王秋澗文集合准監察御史
所言比依郝文忠公例移咨江浙行省於儒學錢糧內
就便刊行相應具呈照詳得此照得郝文忠公文集已
咨江西行省委官提調如法刊畢各印二十部裝褙完
備咨來去訖今據見呈今將秋澗王文定公文集隨此
發去都省合行移咨請照驗依上施行須至咨者

右 咨

江浙行中書省

王翰林文集

年 月 日

諸賢慶壽哀挽詩并序

壽七十詩卷序

翰林學士知制誥同修國史秋澗王公自妙齡即有
文聲予方弱冠時會有持公詩文至公平者予讀之
以未及識面為恨中統建元始遂願見未幾被召至
京師時一款接情相好也既而予求養歸里遂成契
濶至元十二年予應奉翰林文字復二歲公入為待
制玉堂多暇日得考古論文知其所未知聞其所未

聞為樂可勝既哉予賦分涼薄公尋又舍去出貳提
刑按察雖聲問數相及十五年間僅一再會晤迨予
移疾返鄰里而公膺璽書之召予亦誤蒙恩趣還寓
舍頗相遠自非公集率不得相過余益用惘然公長
予六年今平頭七十神明不衰事理至精熟下筆作
文不減平昔至其論古今利害援引証據有條不紊
每賓友期集未嘗後約而至步履輕便不事杖策行
且曳之而鏗然作聲院屬聞之知為公至矣少日多

飲酒近歲浸復不喜遇良辰嘉會驩得意適猶能滿
引舉白至數杯不亂子賢孫孝以學問世其家晚景
泰然順適所欲壽祉方隆未有艾也子著作公孺置
酒為具稱觴上慶諸公例作詩稱頌予為公孺言七
秩之壽未足為君家公賀也申公膺束帛之招衛武
公作詩箴警之日會當副士林之望是席也始為贊
詠張本云元貞二年夏五月東平李謙序

詩

閻承旨

七十人生福壽隆者英纔入畫圖中

者英會七
十方入

靜吟秋

澗雲泉綠安步花磚曉日紅玉樹芝蘭方秀發詞源筆
力愈清雄鹿菴慎獨傳芳派會見遐齡繼兩公

王瓠山

文衡始自文康公敬齋鹿菴聲望隆共城三王稍後出
秋澗早直蓬萊宮升華屢赴延英召下筆咸推言語妙
邊臣獎諭相臣麻百粵三韓同答詔烏臺初立公選掄

掇之持憲材益伸宗祐不嚴考工罪忠言疊疊達楓宸
繡衣山東又河北民不媮浮更姦戢累牋進上春宮圖
玉裕淵冲垂典則出處平生唯自足使節何堪上閩蜀
搜窮學海思道瞻練多世事幾圓熟天朝養賢思禮殊
中統而後元貞初東門賜金開祖幄西園束帛隨徵書
重來地尊年未老積行弼中外敷藻鈎深輯略手編研
謹而書之仍細考共山不煩頻勒移者英今日非公誰
九十司徒昔嘗有康強七十歸豈宜晚生幸際扶搖便

前輩風流親接見中州元氣三數公介壽同饗公堂燕
方平家世有公賢三壽纔行七十年秋澗未容歸舊隱
瀛洲方且會群仙向來政事流遺愛此去文章論正傳
我幸巷南瞻巷北時時訪問得周旋

陳北山

秋澗山翁年七十五色筆頭百鈞力應龍淵潛忽天飛
白日湧雲轟霹靂湏臾風止雨亦霽萬頃淪漪舞秋碧

真書透紙錐畫沙行草入神綰驚蛇胸中政有不平事
搦管一掃無邊涯平生六籍不去手刊落枝葉收菁華
世無公是有公器跳出百家成一家癸巳之秋皆赴召
晚生何堪從諸老長楊館裏共瞻天承明廬中同視草
別公南去五閱春邇來拜公情更親公雖引年乞謝事
看公神觀老益振當年上壽客滿座奉觴迭起為公賀
犀軸綺語光陸離紙尾挂名惜欠我八十行及李東軒
九十會到鹿菴年願從期願數滿千我亦預備長生篇

王鹿泉

早歲聲華便軼羣學優不輟向來勤兩宮垂顧逢千載
三世讀書萃一門蘭省栢臺留讜論玉堂金馬煥雄文
平頭七十無多賀會見諸孫子又孫

故翰林學士秋澗王公哀挽詩序

內翰秋澗公謝事之明年終命於家春秋七十八實
大德甲辰六月辛丑也儼聞之悼心失圖彌日曩自
幼挹公盛名知衛有三王與吾魯有四傑並嘗求其

所為文諷誦之愛其氣格雄拔不窘近世繩尺每以
不獲摳衣趨隅一問津焉為疇昔恨既而公提憲山
東按部過鄆始遂一拜履約輒辱折行輩以待聽其
論說古今文字淵淵浩浩有源有委如法家議獄絲
髮不容少貸一歸公是而止使人胃中之滓都盡嚮
來瓣香於是為贈爾後參商相望瞻拜弗獲徒有江
空歲年晚之歎壬辰同被召詣公車入見世祖皇帝
于上林苑癸巳又同拜北扉之命甲午抑又同在史

局纂修世祖皇帝實錄幸哉日得聆聲歆備準諾惠教弘多尋儼移病歸及再入奉常公已登七秩矣廼出諸名勝賀章見示且命追補前作為賦七言長句公過為擊賞辛丑拜章引年甚力朝議以公三朝耆宿特命進秩二品且授子公孺鄉郡府推以便養仍官孫竒祕書郎以寵其歸恩至渥也比哀問至京師縉紳之流皆失聲相謂曰玉堂東觀寧復有此翁邪往往見之哀誄是則哀生文邪文生哀邪詞之有七

哀八哀豈容已耶一日公孺走書需予引篇首儼以
公宏才碩學揚歷清華殆四十年其事業顯顯著人
耳目之表庸何俟贅言哉惟公嗜古力學凡所未見
書訪求百至必手為謄寫老大尤篤視盛孝章為無
讓平生詩文幾四千篇雜誌總八十卷方易簣始停
筆其勤可謂至矣其振耀來世宜矣嗚呼儼從大人
先生遊能幾時乙未紫山胡公卒丙申若齋雷公卒
祇惟公一人焉今又卒嗟後生小子於何考德問業

馬少陵所謂長嘯宇宙間高才日凌替豈不重可哀
耶乃擬楚騷之亂以抒余哀其詞曰

太行壁天兮橫亘坤維篤生偉人兮企其齊而鞭赤
龍兮駕白霓凌倒景兮滅沒其可追疏決雲漢兮黼
黻明時渾渾灝灝兮孰闕端倪雄味一鳴兮暗萬雌
溘塵埃野馬之一瞬兮浩江河之獨馳嗟形蛻而神
往兮逝者如斯與造物者為徒兮萬萬古猶一暮大
冠如箕兮珮玉陸離耿音容之在目兮眇一去而不

復來叶顧四方上下安所止兮雖巫陽九招竟奚為
諒冥冥或昭昭兮知耶弗知哀鐸有詞兮尚以聲吾
悲

陳儼斂衽端拜

學與天淵博名隨事業新文章早無敵字畫晚逾神冥
躅追前哲遺芳澤後人獨憐秋澗月猶照玉堂春

劉敏中斂衽書

司馬凌雲氣逼真廣川精學道為隣文章館閣三朝舊

富貴兒孫八十春醴酒常存沾講舌內帑特賜表詞臣
歸來勘破浮生夢白玉樓成筆愈神

劉慈頓首上

文章字畫世爭傳四海飛聲自早年冠豸一方驄馬使
腰犀二品玉堂仙承家素學兒孫貴謝事清朝壽福全
零落山丘懷謝傅西川門道獨潛然

王德淵載拜

儒林宜有傳汗竹藹餘青筆陳如飛電詞源若建瓴方

登群玉府遽憶湧金亭欲扣平生學撞鐘愧寸莛

疇昔聞淇上三王籍有聲共推天下士獨擅斗南名吾
道光昭代斯文屬老成玉堂佳話在一讀一傷情

中統文明治都司政事堂寵分鰲禁燭名重柏臺霜空
谷藏遺稿餘哀寄挽章鳳毛今有子染翰侍君王

劉賡辦香書上

嗟哉秋澗公立志恒矯矯文章尤苦辛傑出千仞表公
之筮仕初庶務猶草草每以正自期臨事無大小閩中

憲節回淇上風煙好徵書下九天鑒坡湏故老一旦幡
然歸羣情惜其早餘慶及後裔心事粗能了生平英靈
氣因風入冥杳明月太行顛詩名同皎皎

王約頓首

德業中朝望文章蓋代名誨人循善誘接物極推誠春
露傳家記洄溪別墅銘歿寧無少恨三世荷恩榮

表弟韓從益再拜

縱橫筆陣知無敵如將升壇拜韓白先登劇壘特勇夫

投石翹關乏風格黃金端可鑄鴟夷坐困強吳霸全越
文場自有萬人英豈尚虛浮棄真實唐興繼代重詞科
往往篇章見家集世衰鼠尾競喧啾天下幾人能事畢
王公才敵異徹侯悄焉夜壑藏虛舟倏焉有力負之去
不讓橫槊劉并州勢如偃屋建瓴水熟如平地馳輕輶
味如調羹夏鼎鬻鬻溫如噐琢崑山璆平生無意修邊幅
丈室凝塵勝華屋詩腸耿耿少陵心經笥便便孝先腹
芻冠繡斧滌源清視草判花隨意足南歸鄉里未揮金

寂寞荒阡竟埋玉獨存秋澗大全文來者相傳誦芬馥
至大改元春三月望日洛客暢師文再拜
束髮耽經晚益勤平生精力盡斯文先朝十老今餘幾
當代三王獨數君李賀屢煩韓愈駕羊曇空阻謝安墳
玉堂寥索人何在落日淇川滿白雲

濟南張養浩拜手

大元故翰林學士中奉大夫知制誥同修國史
贈學士承旨資善大夫追封太原郡公謚文定

王公神道碑銘

并序

皇慶壬子歲朝廷推思舊學贈先考中奉府君翰林
學士承旨資善大夫追封太原郡公謚文定先妣推
氏追封太原郡夫人眷恤隆渥上及二代明年春正
月丙午焚黃祭告寵賁松楸越王氏有煒是用追述
先公立身行道致茲顯揚者敢昭告於神道先公諱

惲字仲謀世家于衛曾祖諱經隱居讀書鄉黨化其德字文元先生曾祖妣呂氏臨清大家祖父諱字亡金衛州刑曹孔目官精於文法官敦武校尉用公貴贈集賢侍讀學士大中大夫追封太原郡侯謚敏懿祖妣孟氏韓氏並追封太原郡夫人顯考諱天澤資剛明決科律學魁多士亡金忠顯校尉戶部主事中年折節讀書務教子起宗所交皆海內名士易名文通先生用公貴贈正奉大夫大司農卿追封太原郡

公謚莊靖顯妣靳氏追封太原郡夫人先公幼有至
性勤學好問若飢渴然弱冠受教于鹿菴王公詩文
字畫已有聲紫陽遺山一見為指授所業期以國士
楊西菴曹南湖高吏部徒單顥軒愛其材器折行輩
與交極口為延譽中統建元左丞姚公宣慰東平辟
充詳議官尋被中書召特授翰林脩撰同知制誥兼
修國史院編脩官制詞有行已無玷博學能文顧超
絕之逸才足鋪張於偉績之旨士論榮耀焉一時詔

制辭命皆出其手共稱敏瞻既而兼中書省左司都
事建言曰廟堂出治之源今機務草創當究其本末
先後酌而行之允焉遇事詳處得宜同列許其明達
至元五年肇立御史臺首拜監察御史獻書曰憲臺
執法糾正邪枉今無法可守取人無路宜講法制以
立紀綱設科舉以取人材體用既明朝廷不勞而肅
矣憲察為首前後申明典制彈劾姦邪凡一百五十
餘章切直敢言不畏強禦於政體多所裨益如劾劉

都永怙勢作姦陷公儲四十萬石權貴為側目九年
陞授承直郎平陽路總管府判官晉大府也先是吏
風盛民囂於訟公用誠敬待官長威嚴肅吏屬作勸
諭文二一則勉飭州縣革弊勤政一則諄告百姓務
本畏法致吏民感化奉約束惟謹歷二考如一日絳
兵卒陳姓者殺同產兄在獄因鬻緩逮繫者三百餘
人延滯至三年之久遠近為憤惋省檄鞠問廉得實
跡一問即服時晉絳久旱是夕大雨霑足咸謂伸理

寬抑所致各路設辦課官例守門下平陽所轄院務
幾百按籍點差終任不易藩府採姑射山文石藉夫
匠力闢山蹊為坦途者六十里西山伏利由之而出
土人刻石紀其事大起府學敦勉師生傳授暇率吏
屬聽講風俗為之丕變又復回車嶺孔子廟首陽山
二賢祠修建廨傳遞鋪以間計者千數增戶餘三千
敕使過晉者以政績上聞至蒙奉公勤政之諭十三
年奉命同陳節齋考試河南五路儒士語於陳曰吾

道如綫不宜用平時取法凡就試者皆以通文學第
之十四年授翰林待制奉訓大夫鹿菴大學方執文
衡屢稱其文章精妙明年秋選授朝列大夫河北河
南道提刑按察副使改除燕南秩競移山東東西道
先公之任風憲嘗諭僚屬監司職在繩愆糾繆肅清
政務惟自治而後可以治人又憲府非有錢穀詞訟
之繁特明大體布公道事當熟議極乎中正方可服
衆惟克已自勵故按治州郡褰帷具瞻有風動百城

之目部內府尹恃占名鷹房恣為不法公納賄賂莫敢誰何即按劾罪狀以聞蒙杖而黜焉憲臺徧諭諸道遠近為肅然冀州監從人因造作掊眾利甚夥與監逸去事白曰行司巡歷動經歲時俟獲而治則姦人得計矣質其田宅償其民南宮弭筆者號尹庫因告訐曾蒙賞賚沮嚇官府肆凶牟利或言其擅殺耕牛歷數奸惡痛杖之而死萬口稱快又辨釋德平民劉氏疑獄一十八年除行臺治書侍御史不赴進承

華事略於東宮廣孝立愛端本類二十篇採古儲貳
善事前有圖後斷以已意蒙裕皇徧覽稱善賜酒有
極用心纂述之諭令諸皇孫傳觀宮寮稱其弘益良
多聖上命近臣繪寫以賜東宮二十二年奏充中書
省左司郎中屢趣不應時小臣盧以理財用事或問
其故曰力小任重剥衆利己未見能久者可近待既
而果敗衆服其識先而有守廿六年授少中大夫福
建閩海道提刑按察使甌閩僻在海隅歸附後官貪

民殘奄為盜區黠尤貪惡者數十人乃上章彈劾行
省官非其人宜選文武備具有籌策大臣矯正枉濫
肅清邊陲則民心服而寇盜息巨賊鍾明亮嘯聚洪
閩郊東擊則西逸西逐則東奔彼此玩寇師老無功
乃請立主帥尊號令朝廷允焉賊果潰滅廿七年以
疾得告北歸廿八年朝廷以耆宿來徵明年二月謁
見世祖皇帝於柳林行宮蒙慰諭久之繼上萬言書
條陳時政一日議憲章以一政體二曰定制三曰抑

奢僭三曰節浮費以豐財用四曰慎名爵以攬威權
五曰重廉司以勵庶官六曰議保舉以核名實七曰
設科舉以收人材八曰試吏員以清政務九曰恤兵
民以固邦本十曰復常平以廣蓄積十一曰開屯田
以息遠餉十二曰息遠略以撫已有十三曰感和氣
以銷水旱十四曰崇教化以厚風俗十五曰減行院
以一調遣十六曰絕交貢以示曠度旨嘉納焉授翰
林學士嘉議大夫與議政事凡預廷議知無不言成

宗嗣位獻守成事鑑曰敬天法祖愛民恤兵凡十五篇逐事具說本諸經旨侍臣謂純正親切有魏文貞司馬端明之風元貞改元加通議知制誥同修國史纂修世祖實錄作表進呈及封謚除拜大典冊皆經定撰大德元年進中奉明年戊戌春以三朝舊臣賜楮幣萬緡其年七十請老不許五年再上章懇請除公孺自祕著司刑部郎以便侍養仍官孫竒祕書郎榮其歸方優游鄉里樂遂安閒不幸於大德甲辰歲

六月辛丑以疾薨于私第正寢之春露堂享年七十有八越九月己酉葬河西里之先塋夫人推氏祔焉送葬餘萬人及四方來弔祭者哭皆失聲曰五百年那復得此公耶先妣共城人尚醫推公季女資婉順事舅姑睦嫻親以孝敬聞先公所得俸給均之家人惟恐失所若稍越規矩即治之如法故皆悅服而不敢犯女侍生二子善加撫育無異已出內助力為多先十八年卒生子公孺奉議大夫知潁州事孫三筭

朝列大夫中書刑部郎官次詵次侃年尚幼女孫二
長適昭文館大學士耶律伯強子著作郎楷次適甯
氏子重孫五男漢璋德璋潤璋女二皆幼庶子二公
儀廕授承務郎同知磁州事公說衛輝路儒學正生
子瑣住先公資明敏正文材器英邁操行純古博學
有經濟器業與人交樂易直諒不能詭隨與時俯仰
常曰士當明其所學明義達道一以至誠將之窮達
得失有不在己者當官持重有體守正奉公表表欲

見于世故所至有聲遇不平事及惡之可疾者憤然
必窮治乃已官清要四十年自奉如寒士平生篤於
禮義視勢利蔑如藩國世子且貴顯於朝招翰林諸
公讌集私覲禮衆議未一曰禮上國卿當下國君遂
平揖而已省掾趙和之病疽迎醫救視沒為殯斂以
行索付其家友人周曲山能官至廉卒無以葬營治
至成禮南官劉文卿善數學客死於衛既周其喪妻
少囊珍具甚富求一室相倚以禮謝去其廉正類此

少與西溪春山友善時目淇上三王別號王秋澗晚
節名德俱重為世尊仰不稱姓字但曰秋澗公作為
文章不蹈襲前人要自肺腑中流出平居談話無異
於人及採觚染翰經旨之義理史傳之鋪陳子集之
英華古今體制間見疊出雄深雅健辭古而意不晦
以自得有用為主宜乎綰持文柄獨步一時字畫道
婉以魯公為正所書卷帖為世珍玩樂教掖後進明
義理工文章必盡所得又善因材致篤故藉之多顯

達者自少至老未嘗一日不學易簣方停筆平昔著
相鑑五十卷汲郡志十五卷其承華事略守成事鑑
中堂事記烏臺筆補玉堂嘉話賦頌詔誥表啓書疏
詩文碑誌銘贊樂府號秋澗大全文集者一百卷延
祐六年蒙朝廷公議為之刊播焉富哉言乎其勤篤
至矣其振耀後世宜矣至於論列時務利害互明得
失兼著忠愛情切聞一事可行一士可用必為建白
雖未盡行後竟如所言較其蘊奧見諸行事者纔十

之二三故贈謚其制詞有觀其遺書蓋抱經綸之志
詢夫成績豈徒黼黻之材惟治朝著蔡之是稽繫後
生斗山之所仰蓋公論云敢用是為銘辭曰

士惟有立德功與言能一於此不朽者存顯允先公
睠茲克勤策勳學海力振斯文擴我浩氣塞乎乾坤
手抉雲漢大放辭源鴻文大冊帝載昭宣人所共知
方駕昔賢紹韓歐之宗派得文章之正傳臣時禪政人
有未知志存經濟惟日孜孜拜章奏記罔或少遺有

物禁訶百纔幾施時耶命耶而止於斯載瞻遺稿為
世著龜山斗聞望後學仰規內相美謚恤典恩推見
諸行事功止一時著書傳後千古是希孰得孰失必
能辨之又何俟曠世相感則吾道為庶幾用是昭告
神寧無疑大行峻極清泉漣漪淵峙無窮永照豐碑

嗣子公孺撰

秋澗集後序

先考文定公人品高古才氣英邁勤學好問敏於製
作下筆便欲追配古人騰芳百代務去陳言辭必已
出以自得有用為主精粹醇正非他人所可擬自其
弱冠已嘗請教於紫陽遺山鹿菴神川諸名公愛其
不凡提誨指授所得為多及壯周旋於徒單侍講曹
南湖高吏部郝陵川王西溪胡紫山之間天資既異
師問講習者又至繼之以勤苦不輟致博學能文之

譽聞於遠近其後五任風憲三入翰林遇事論列隨時記載未嘗一日停筆平生底蘊雖畧施設然素抱經綸心存致澤桑榆景迫有志未遂一留意於文字間義理辭語愈通貫精熟矣故學者以正傳名家推尊之既捐館公孺編類遺藁為一百卷字幾百萬咸謂學有餘而不盡其用者則其言必大傳於後奈家貧無力不能刊播言之盡傷若訢訢在疚恐一旦溘先朝露目為不瞑矣延祐己未歲冬季孫竒方任刑

曹郎官走書於家取其遺文云朝廷公議先祖資善
府君平生著述光明正大關係政教嘗蒙乙覽致有
弘益堂移江浙行省給公帑刊行以副中外願見之
心公孺聞之不勝欣躍因念韓文公為唐大儒學者
仰之如山斗其文集自唐至宋歷二百年之久賴柳
如京之賢方刻板本流傳於世先君去世今纔十五
寒暑特蒙朝廷發揚如是實為希濶之遇予以見聖
朝崇儒右文之美光賁千古矣延祐七年庚申正月

哉生明男王公孺百拜叙書于後


秋澗集後序

翰林承旨文定王公衛之名儒秋澗其號也從游遺
山紫陽鹿菴神川四先生之門講貫漸磨深造閭域
語性理則以周邵程朱為宗論文章則以韓柳歐蘇
為法才思泉湧下筆輒數千言星回漢翻韶鳴鳳躍
千變萬狀可駭可愕文中巨擘也學古入官敷歷中
外內而金馬玉堂外而豸冠繡斧所至有令譽雖公

務填咽手不釋卷耽書嗜古天性然也公長子翰林
待制紹卿嘗集公平生所作分為百卷題曰秋澗先
生大全文集度藏家塾以貽後人繼而有聞於朝者
取而寘之黃閣未幾咨發江浙行省議鉅諸梓卷帙
繁公費夥或者難之庚申冬檄送本路俾會學廩之
贏以給其用命出省府奉行惟謹矧余與文定居同
鄉姓同氏視公猶父行承乏嘉禾幸獲覩公之遺文
又安敢不用情耶廼命郡博羅君應龍任其責學錄

余元第專董其事仍委蘭溪州判唐泳涯校正擇諸
生中能書者重為繕寫以授刊者工役甫見次第余
適叨廣東憲節之命秣馬就道遂書此以畀禾學刻
之卷末云皆至治改元重光作噩歲清和月古衛王
秉彝謹序

謹按卷一百第十頁前一行庫克烏呼舊作窟速
吾今改 十頁前五行鴻托懶舊作渾獨刺今
改 十頁前七行博勒格圖舊作畢里紇都今
改 十頁後一行鄂濟木諾兒舊作吾悟竭惱
兒今改 十頁後八行呼蘭齊勒舊作忽蘭赤
斤今改 十一頁前一行塔密爾舊作塌米今
改 十八頁前三行呼沙呼舊作忽沙虎今改



總校官進士 臣胡 崇

校對官學正 臣卜維吉

謄錄貢生 臣繆 瀛

財團
法人
佛陀教育基金會
釋淨空
敬贈

